

Umsögn dómnefndar

samkvæmt III. kafla laga nr. 50/2016 um dómstóla

um umsækjendur um skipun í embætti dómara með fyrsta starfsvettvang

við Héraðsdóm Norðurlands eystra sem auglýst var laust til umsóknar í

Lögbirtingablaði 8. maí 2026.

Reykjavík, 13. júlí 2026

EFNISYFIRLIT

1. Umsækjendur	2
2. Sjóarmið sem nefndin byggir mat sitt á.....	2
3. Um málsmeðferð dómnefndar	5
4. Almennar upplýsingar um umsækjendur.....	5
5. Mat á hæfni umsækjenda.....	10
5.1. Almenn starfshæfni og andlegt atgervi	10
5.2. Menntun og framhaldsmenntun	11
5.2.1. Menntun og framhaldsmenntun – samanburður	11
5.3. Reynsla af dómstörfum.....	12
5.3.1. Reynsla af dómstörfum – samanburður	12
5.4. Reynsla af lögmanns- og málflutningsstörfum	13
5.4.1. Reynsla af lögmanns- og málflutningsstörfum – samanburður.....	14
5.5. Reynsla af stjórnásluststörfum.....	14
5.5.1. Reynsla af stjórnásluststörfum – samanburður	15
5.6. Reynsla af fræðistörfum o.fl.	16
5.6.1. Kennsla á háskólastigi og önnur akademísk störf.....	16
5.6.1.1. Kennsla á háskólastigi og önnur akademísk störf – samanburður	17
5.6.2. Fræðibækur og -greinar o.fl.....	17
5.6.2.1. Fræðibækur og -greinar o.fl. – samanburður	17
5.7. Reynsla af stjórnun	18
5.7.1. Reynsla af stjórnun – samanburður.....	19
5.8. Reynsla af öðrum störfum sem nýtast dómaraefni o.fl.	19
5.8.1. Reynsla af öðrum störfum sem nýtast dómaraefni o.fl. – samanburður.....	20
5.9. Sérstök starfshæfni.....	20
6. Færni umsækjenda til að semja dóma.....	21
7. Niðurstaða dómnefndar.....	22

1. Umsækjendur

Með bréfi 1. júní 2026 fór dómsmálaráðuneytið þess á leit við dómnefnd samkvæmt III. kafla laga nr. 50/2016 um dómstóla að hún léti í té umsögn um hæfni umsækjenda um skipun í embætti dómara með fyrsta starfsvettvang við Héraðsdóm Norðurlands eystra sem auglýst var laust til umsóknar 8. maí 2026 í Lögbirtingablaði.

Eftirtaldir sóttu um embættið: Erna Björt Árnadóttir aðstoðarmaður dómara, Jón Stefán Björnsson aðstoðarmaður dómara, Margrét Helga Kristínar Stefánsdóttir lögfræðingur, Sigmundur Guðmundsson lögmaður og Þorbjörg Inga Jónsdóttir lögmaður.

Samkvæmt 3. gr. reglna nr. 970/2020 um störf dómnefndar lætur dómsmálaráðherra staðreyna að umsækjendur uppfylli öll hin almennu hæfisskilyrði embættanna sem auglýst voru laus til umsóknar. Niðurstaða ráðuneytis dómsmála er sú að umsækjendur uppfylli allir þau skilyrði.

Umsögn dómnefndar fer hér á eftir.

2. Sjónarmið sem nefndin byggir mat sitt á

Samkvæmt 1. mgr. 12. gr. laga nr. 50/2016 skal dómnefnd láta ráðherra í té skriflega og rökstudda umsögn um umsækjendur um embætti dómara. Skal í umsögn dómnefndar tekin afstaða til þess hvaða umsækjandi sé hæfastur til að hljóta embættið en heimilt er að setja tvo eða fleiri umsækjendur jafna.

Þágildandi lögum nr. 15/1998 um dómstóla var breytt með lögum nr. 45/2010. Í athugasemdum við þá málsgrein síðargreindu laganna, er varð að 2. mgr. 4. gr. a laga nr. 15/1998, sbr. nú 1. mgr. 12. gr. laga nr. 50/2016, segir meðal annars svo: „Við mat á hæfni dómaraefna er til margra atriða að líta, svo sem starfsreynslu á sviði lögfræði, hvort heldur hún er á sviði dómstarfa, málflutnings, annarra lögmannsstarfa, fræðistarfa eða innan stjórnsýslunnar, en almennt verður umsækjandi að hafa til að bera almenna og víðtæka lögfræðilega menntun og þekkingu. Rétt er einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýtast dómaraefni. Almennt

verður að telja umsækjanda til tekna að hafa yfir að búa fjölbreyttri starfsreynslu, þótt meta verði það hverju sinni. Dómnefndinni er einnig rétt að líta til og að leita sérstaklega eftir umsögnum um störf umsækjanda og þess hvort hann sé skilvirkur í störfum sínum og vinnusamur, hvort hann hafi til að bera hæfni til að skilja aðalatriði frá aukaatriðum og setja álit sitt fram á skiljanlegan hátt, bæði munnlega og skriflega. Er í því skyni unnt að líta til fræðirita, reynslu umsækjanda af málflutningi eða þeirra dóma sem umsækjandi kann að hafa samið. Umsækjandi um dómaraembætti verður enn fremur að geta átt góð samskipti við aðra.“

Í lok 1. mgr. 12. gr. laga nr. 50/2016 kemur fram að ráðherra setji að öðru leyti nánari reglur um störf dómnefndar. Dómsmálaráðherra hefur sett reglur nr. 970/2020 um störf dómnefndar sem fjallar um hæfni umsækjenda um dómaraembætti, en þær komu í stað eldri reglna um sama efni, nr. 620/2010. Í 4. gr. hinna nýju reglna er á sama hátt og í 4. gr. þeirra eldri fjallað um sjónarmið sem nefndin skal byggja mat sitt á. Þar segir meðal annars: „Dómnefnd skal gæta þess við mat sitt að samræmis sé gætt þannig að jafnræði sé í heiðri haft. Niðurstaðan skal byggð á heildstæðu mati á grundvelli málefnalegra sjónarmiða og skal þar byggt á verðleikum umsækjenda með hliðsjón af menntun og reynslu, ráðvæðni, hæfni og skilvirkni í starfi ... Við mat á menntun, starfsferli og fræðilegri þekkingu skal dómnefndin miða við að æskilegt sé að umsækjandi hafi fjölbreytta starfsreynslu á sviði lögfræðinnar, s.s. reynslu af dómstörfum, málflutningi eða öðrum lögmannsstörfum, störfum innan stjórn-sýslunnar eða fræðistörfum. Miðað skal við að umsækjandi hafi til að bera almenna og víðtæka lögfræðilega þekkingu og menntun. Þá skal litið til þess hvort umsækjandi hefur stundað framhaldsnám ... Dómnefnd ber einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýtast dómaraefni. Loks er heimilt að líta til víðtækrar þátttöku í félagsstarfi ... Við mat á almennri starfshæfni skal litið til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með að skilja aðalatriði frá aukaatriðum. Æskilegt er að hann hafi reynslu af stjórnun. Umsækjandi skal hafa góða þekkingu á íslensku máli og eiga auðvelt með að tjá sig í ræðu og riti ... Mikilvægt er að umsækjandi hafi einkamála- og sakamálaréttarfar á valdi sínu og geti farið að fyrirmælum laga um samningu dóma og ritað þá á góðu máli. Hann verður

að geta stjórnað þinghöldum af röggsemi og sanngirni og afgreitt þau mál sem honum eru fengin, bæði fljótt og af öryggi ... Umsækjandi þarf að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð er krafa um að af umsækjanda fari gott orð bæði í fyrri störfum og utan starfa og að reglusemi hans sé í engu ábótavant.“

Í almennum athugasemdum við frumvarp það, er varð að lögum nr. 45/2010 um breytingu á lögum nr. 15/1998, er áréttað að í öðrum lögum sé einnig að finna ákvæði sem taka verður tillit til við skipun dómara, svo sem í stjórnarsýslulögum nr. 37/1993, lögum nr. 10/2008 um jafna stöðu og jafnan rétt kvenna og karla og lögum nr. 70/1996 um réttindi og skyldur starfsmanna ríkisins. Ennfremur er þar minnt á að í tilmælum ráðherranefndar Evrópuráðsins nr. R(94)12 frá 13. október 1994 um sjálfstæði, skilvirkni og hlutverk dómenda (On the Independence, Efficiency and Role of Judges) kemur fram að allar ákvarðanir um skipun og starfsframa dómara skuli byggðar á hlutlægum sjónarmiðum og byggjast á verðleikum, með hliðsjón af hæfi, ráðvendni, hæfni og skilvirkni í starfi.

Dómnefnd hefur áður fjallað um í umsögnum sínum hvaða merkingu beri að leggja í þau ummæli 4. gr. reglnanna „að æskilegt sé að umsækjandi hafi fjölbreytta starfsreynslu“ og tekið fram að þetta matsviðmið sé ekki einfalt í meðförum. Einnig að fjölbreytt starfsreynsla umsækjanda geti aukið lögfræðilega þekkingu hans, en slíkt sé þó ekki endilega raunin. Sú ályktun hefur verið dregin af athugasemdum með frumvarpi, er varð að lögum nr. 45/2010, að megináhersla sé þar lögð á lögfræðilega þekkingu umsækjandans. Með fjölbreyttri starfsreynslu sé átt við fjölbreytileika starfa, sem umsækjendur hafa sinnt, en ekki síður hve verkefnin, sem þeir hafa fengist við, séu fjölbreytileg í þeim skilningi að þeir hafi reynslu af því að beita réttarreglum á ólíkum sviðum lögfræði. Þá skiptir lögfræðileg þekking umsækjanda ekki máli, ein og sér, þegar mat er lagt á hæfni hans til að gegna embætti dómara í samanburði við aðra umsækjendur, heldur er einnig nauðsynlegt, eftir því sem tók eru á, að meta færni hans til að nýta þá þekkingu við úrlausn dómsmála.

3. Um málsmeðferð dómnefndar

Við meðferð máls skipuðu eftirtalin dómnefndina: Ása Ólafsdóttir, formaður, Helga Melkorka Óttarsdóttir, Jóhannes Sigurðsson, Reimar Pétursson og Þorgeir Örlygsson. Umsækjendum var sent tölvubréf 5. júní 2026 þar sem óskað var eftir því að þeir gerðu athugasemdir við sérstakt hæfi framangreindra nefndarmanna teldu þeir einhverjar vanhæfisástæður fyrir hendi. Ekki komu fram athugasemdir við sérstakt hæfi nefndarmanna.

Fyrsti fundur dómnefndar var 9. júní 2026. Samkvæmt 10. gr. reglna nr. 970/2020 reiknast sex vikna afgreiðslufrestur nefndarinnar frá þeim degi.

Í framangreindri auglýsingu frá 8. maí 2026 var meðal annars áskilið að fram kæmu í umsóknum um dómaraembætti upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Í þeim tilvikum sem umsækjendur tilgreindu sömu umsagnaraðila og höfðu nýlega veitt dómnefnd umsagnir um þá í fyrri matsferlum voru þær umsagnir lagðar til grundvallar að ósk umsækjenda. Í öðrum tilvikum var aflað nýrra umsagna.

Dómnefnd bauð öllum umsækjendum að koma til viðtals og átti viðtöl við umsækjendur sem þess óskuðu 29. og 30. júní 2026.

Samkvæmt 8. gr. reglna nr. 970/2020 voru umsækjendum send drög að umsögn dómnefndar með tölvubréfum 8. júlí 2026, þar sem þeim var gefinn kostur á að gera athugasemdir við þau til 13. sama ár. Þess var sérstaklega farið á leit í bréfinu að fram kæmi svo fljótt sem kostur væri hvort umsækjendur hygðust gera athugasemdir og þær yrðu þá sendar sem fyrst. Athugasemdir bárust frá einum umsækjanda og leiddu þær til minni háttar breytinga á fyrirleggjandi drögum að umsögn en ekki til breytinga á heildarniðurstöðu nefndarinnar.

4. Almennar upplýsingar um umsækjendur

Hér á eftir verður gerð grein fyrir menntun og reynslu umsækjenda, en 5. kafli hefur að geyma mat dómnefndar á hæfni umsækjenda og viðmið á grundvelli þeirra meginsjónarmiða sem reifuð voru í 2. kafla. Upplýsingarnar í þessum köflum eru fyrst og fremst byggðar á umsóknum umsækjenda. Ekki er greint frá öllu því, sem þeir hafa

talið þar upp, heldur verður í mati þessu almennt getið helstu starfa og viðfangsefna er þeir hafa sinnt að loknu laganámi, auk þess sem leitast hefur verið við að gæta samræmis þeirra á milli þegar gerð er grein fyrir þessum atriðum.

Erna Björt Árnadóttir er fædd 9. október 1979 og er því 46 ára. Hún lauk BA-prófi í lögfræði frá Háskóla Íslands árið 2019 og meistaraprófi frá sama háskóla árið 2021. Hún lauk einnig diplómanámi á meistarastigi í afbrotufræði frá Háskóla Íslands árið 2021, diplómanámi á meistarastigi í opinberri stjórnsýslu frá sama skóla árið 2024 og meistaránámi í áfallastjórnun við Háskólann á Bifröst í júní 2026. Jafnframt hefur hún sótt ýmis námskeið um lögfræðileg efni. Hún starfaði sem dómritari við Héraðsdóm Reykjaness frá árinu 2006 en hefur starfað sem aðstoðarmaður dómara við dómstólinn frá febrúar 2022. Umsækjandinn hefur verið varamaður í stjórn dómstólasýslunnar frá 2017 og hefur á tímabilinu fjórum sinnum tekið sæti í forföllum aðalmanns. Þá hefur hún setið í stýri- og vinnuhópum á vegum dómstólasýslu og dómsmálaráðuneytis auk þess að hafa setið í hópi á vegum dómsmálaráðuneytis sem kom að undirbúningi og samningu frumvarps til laga um breytingu á lögum um aðför nr. 90/1989 og lögum um nauðungarsölu nr. 90/1991 ásamt síðari breytingum sem sneri að stafrænni málsmeðferð.

Jón Stefán Björnsson er fæddur 30. desember 1980 og er því 45 ára. Hann lauk BS-gráðu í viðskiptalögfræði frá Háskólanum á Bifröst árið 2006 og meistaraprófi í lögum frá Háskólanum í Reykjavík árið 2011. Umsækjandinn öðlaðist réttindi sem héraðsdómslögmaður árið 2013 og löggildingu sem fasteigna- og skipasali árið 2015. Þá hefur hann sótt ýmis námskeið og endurmenntun á sviði lögfræði og stjórnunar, meðal annars á vegum Endurmenntunar Háskóla Íslands og Opna Háskólans í Reykjavík. Að lokinni BS-gráðu í viðskiptalögfræði starfaði umsækjandinn hjá Einkaleyfastofu frá 2006 til 2009. Þá starfaði hann að lögfræðilegum verkefnum og síðar sem lögfræðingur hjá Íslandsbanka árin 2010 til 2014 en hóf í framhaldinu störf hjá Ríkisskattstjóra þar sem hann starfaði í um níu mánuði. Frá 2015 til 2017 starfaði hann sem lögmaður hjá Arion banka, frá 2017 til 2020, sem lögfræðingur með lögmannsréttindi hjá Tollstjóra og frá þeim tíma til 2022 sem lögfræðingur hjá Skattinum. Það ár hóf hann störf sem lögfræðingur með lögmannsréttindi hjá embætti skattrannsóknarstjóra og sinnti því starfi fram í október 2025 er hann hóf störf sem

aðstoðarmaður dómara við Héraðsdóm Reykjaness þar sem hann hefur starfað síðan. Umsækjandinn hefur í tvígang kennt á námskeið í Tollaskólanum. Þá hefur hann átt sæti í stjórn unglingaráðs knattspyrnudeildar Breiðabliks frá árinu 2022.

Margrét Helga Kristínar Stefánsdóttir er fædd 31. október 1988 og er því 37 ára. Hún lauk BA-prófi í lögfræði frá Háskóla Íslands árið 2010 og meistaraþrófi frá sama háskóla í febrúar 2013. Umsækjandinn öðlaðist réttindi sem héraðsdómslögmaður í apríl 2013 og lauk prófi í gerð eignaskiptayfirlýsinga í október 2019. Jafnframt hefur hún sótt ýmis námskeið um lögfræðileg efni. Að loknu laganámi frá apríl 2013 starfaði umsækjandinn á lögmannsstofu þar til í ágúst 2016 en í september sama ár hóf hún störf sem aðstoðarmaður dómara við Héraðsdóm Reykjaness og sinnti því starfi til ársloka 2017. Frá byrjun árs 2018 til ágúst 2020 starfaði umsækjandinn sem aðstoðarmaður dómara við Landsrétt og frá september 2020 til september 2021 sem aðstoðarmaður dómara við Hæstarétt. Á árinu 2021, frá september til og með nóvember, var hún settur dómari við Héraðsdóm Vestfjarða og gegndi starfi dómstjóra á tímabilinu. Frá janúar 2022 til maí 2023 starfaði hún hjá dómstólasýslunni sem verkefnastjóri stafrænnar umbreytingar málsmeðferðar fyrir dómstólum og hóf að því loknu störf sem lögmaður og verkefnastjóri á lögmannsstofu þar sem hún starfaði til október 2025, að þeim tíma undanskildum er hún var settur dómari við Héraðsdóm Reykjaness tímabilið frá 1. mars til og með 15. júlí 2025. Frá október til desember 2025 starfaði umsækjandinn sem aðstoðarmaður dómara við Héraðsdóm Norðurlands Eystra í sérverkefnum og hóf í janúar 2026 störf sem lögfræðingur hjá umboðsmanni Alþingis. Frá maí 2023 til desember 2025 starfaði hún sem ritari kærunefndar útboðsmála auk þess sem hún sat sem varamaður í fjölmiðlanefnd frá júlí 2024 en sem aðalmaður frá september það ár fram til desember 2025. Umsækjandinn var stundakennari í réttarfari við lagadeild Háskóla Íslands 2015, 2023 og 2024 og hefur einnig haft umsjón með sviðsettum réttarhöldum í áföngunum Réttarfar I og II og Hlutverki dómara og lögmannna frá 2023 auk þess að hafa verið prófdómari í samkeppnisrétti árið 2018 við sömu deild. Umsækjandinn hefur ritað eina ritrýnda grein ásamt öðrum. Veturinn 2022 til 2023 sat umsækjandinn sem fulltrúi dómstólasýslunnar í vinnuhópi á vegum dómsmálaráðuneytisins sem vann tillögur að reglum um birtingar af hálfu dómstóla, lögreglu og ákærvalds í

stafrænu pósthólfi stjórnvalda, sat í Laganefnd Lögmannafélags Íslands á árunum 2024 til 2025 og var tengiliður Landsréttar og Hæstaréttar í samstarfsneti æðri dómstóla á vegum Mannréttindadómstóls Evrópu (Superior Courts Network) á árunum 2019 til 2021. Þá hefur hún flutt ýmis erindi og kynningar um lögfræðileg málefni, einkum á sviði réttarfars.

Sigmundur Guðmundsson er fæddur 27. febrúar 1964 og er því 62 ára. Umsækjandinn lauk kandidatsprófi í lögfræði frá Háskóla Íslands árið 1991. Hann öðlaðist réttindi sem héraðsdómslögmaður árið 1995 og réttindi til þess að flytja mál fyrir Landsrétti árið 2022. Þá lauk hann námi í vinnumarkaðsfræðum og stjórnun við Stokkhólmsháskóla árið 1997 og hefur sótt ýmsa fyrirlestra og námskeið á sviði lögfræði, meðal annars hjá Lögmannafélagi Íslands og Háskóla Íslands. Að loknu laganámi starfaði umsækjandinn sem löglærður fulltrúi sýslumannsins í Kópavogi til ársins 1995, þar af sem staðgengill sýslumanns frá 1994 til 1995, og hjá sýslumanninum á Akureyri frá 1999 til 2003. Umsækjandinn var sjálfstætt starfandi lögmaður frá 2003 til 2023 og var lengst af með eigin rekstur í félagi við annan lögmann. Þá flutti hann sig um set á aðra lögmannsstofu þar sem hann starfar nú. Veturinn 2014 til 2015 var hann prófdómari meistaraprófsritgerða við Háskólann á Akureyri. Umsækjandinn sat í umhverfisnefnd Eyjafjarðarsveitar 2002 til 2010, þar af sem formaður árin 2006 til 2010, í skólanefnd Eyjafjarðarsveitar árin 2010 til 2018, þar af formaður 2014 til 2018 og í barnaverndarnefnd Eyjafjarðar frá 2014 til 2018 eftir að hafa verið varamaður frá 2010. Frá 2023 hefur hann verið varaformaður Umdæmisráðs landsbyggða sem fer með úrskurðarvald á sviði barnaverndarmála. Þá hefur hann setið í Fagráði Háskólans á Akureyri frá 2025 og stjórn Félags lögfræðinga á Norður- og Austurlandi frá 2010, þar af sem formaður frá 2024. Þá hefur umsækjandi setið í yfirkjörstjórn Norðausturkjördæmis frá 2022, þar af sem formaður frá júní 2026.

Þorbjörg Inga Jónsdóttir er fædd 30. janúar 1967 og er því 59 ára. Hún lauk embættisprófi í lögfræði frá Háskóla Íslands í júní 1993. Umsækjandinn útskrifaðist með diplómu í þjóðarrétti árið 1995 frá Háskólanum í Helsinki í Finnlandi og diplómu í viðskipta- og rekstrarfræði árið 2000 frá Endurmenntunarstofnun Háskóla Íslands. Hún hóf meistaránám á sviði mannréttinda við Global Campus of Human Rights and Democracy í Feneyjum haustið 2024. Í febrúar 2025 hófst rannsóknarhluti námsins í

Háskólanum í Nottingham og skilaði hún meistararitgerð um sumarið. Hún öðlaðist réttindi sem héraðsdómslögmaður árið 1994 og réttindi til þess að flytja mál fyrir Hæstarétti árið 2002. Þá hefur hún sótt ýmis námskeið í endurmenntun um lögfræðileg efni, meðal annars hjá háskólum og félagasamtökum hérlandis og erlendis. Að loknu laganámi árið 1993 starfaði umsækjandinn sem lögfræðingur hjá Ábyrgðasjóði launa til ársins 1994 og árin 1994 til 1996 sem lögfræðingur hjá vinnumálaskrifstofu félagsmálaráðuneytis. Vorið 1996 hóf hún rekstur eigin lögmannsstofu og fasteignasölu í félagi við annan lögmann sem stóð til vorsins 2001 þegar hún stofnaði lögmannsstofu þar sem hún starfar nú og hefur rekið ein frá þeim tíma. Umsækjandinn sinnti stundakennslu í eignarrétti, kröfurétti og almennri lögfræði við Háskólann á Bifröst árin 2007 til 2022 og stundakennslu í kröfurétti við Háskólann á Akureyri árið 2024 og í málstofu um lögmannsstarfið við sama háskóla frá 2025. Auk þessa hefur hún sinnt kennslu og flutt fyrirlestra um lögfræðileg málefni, meðal annars hjá Endurmenntunarstofnun Háskóla Íslands og á vegum Mannréttindastofnunar og Þróunarsjóðs EFTA. Umsækjandinn hefur tvisvar verið oddamaður í gerðardómi. Hún sat í kærunefnd útlendingamála frá júní 2016 til desember 2024 og var formaður úrskurðarnefndar um sanngirnisbætur frá 2011 til 2019. Þá sat hún sem aðalmaður í nefnd um eftirlit með störfum lögreglunnar frá 2017 til febrúar 2025 en hefur verið varamaður í nefndinni frá þeim tíma. Umsækjandinn sat í yfirkjörstjórn Mosfellsbæjar frá 2001 til 2022, þar af sem formaður frá 2002. Árið 1994 tók hún sæti í félagsmálanefnd Mosfellsbæjar, sem var sameinuð húsnæðisnefnd og fjölskyldunefnd sveitarfélagsins árið 1995, og sat áfram sem aðalmaður til 2022, þar af sem varaformaður félags- og barnaverndarnefndar sveitarfélagsins frá 2003. Hún hefur setið í nefndum á vegum ríkisins og gegnt trúnaðarstörfum í stjórnnum ýmissa stofnana og félagasamtaka bæði innanlands og erlendis. Meðal annars sat hún í stjórn Sparisjóðs Vestmannaeyja frá 2011 til 2015, þar af sem formaður frá 2013. Þá var umsækjandinn stjórnarmaður og formaður Kvenréttindafélags Íslands árin 2000 til 2009, stjórnarmaður í Bjarkarhlíð frá 2017 til 2019 og formaður stjórnar frá 2019 til 2023, stjórnarmaður í Bjarmahlíð frá 2018 til 2024 og stjórnarmaður í stjórn Lífeyrissjóðs bænda frá árinu 2025.

5. Mat á hæfni umsækjenda

5.1. Almenn starfshæfni og andlegt atgervi

Í 2. mgr. 29. gr. laga nr. 50/2016 er í sjö töluliðum mælt fyrir um þau almennu hæfisskilyrði sem umsækjendur um embætti héraðsdómara þurfa að uppfylla til að skipa megí þá í embættið. Meðal þessara skilyrða eru að umsækjandi sé svo á sig kominn andlega og líkamlega að hann geti gegnt embættinu, sbr. 3. tölulið, hafi ekki sýnt af sér háttsemi, sem getur rýrt það traust sem dómarar verða almennt að njóta, sbr. 5. tölulið, hafi lokið embættisprófi eða grunnnámi ásamt meistaraþrófi í lögum, sbr. 6. tölulið og kafla 5.2 hér á eftir, og teljist vera hæfur til að gegna embættinu í ljósi starfsferils síns og lögfræðilegrar þekkingar, sbr. 8. tölulið. Eins og áður greinir hefur ráðherra samkvæmt 3. gr. reglna nr. 970/2020 látið staðreyna að umsækjendurnir uppfylli öll þessi hæfisskilyrði.

Í 3. tölulið 4. gr. reglnanna kemur fram að við mat á almennri starfshæfni skuli dómnefnd líta til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með að skilja aðalatriði frá aukaatriðum. Þá segir einnig að umsækjandi skuli hafa góða þekkingu á íslensku máli og eiga auðvelt með að tjá sig í ræðu og riti. Ennfremur er tekið fram í 5. tölulið 4. gr. að umsækjandi þurfi að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð sé krafa um að af umsækjanda fari gott orð, bæði í fyrri störfum og utan starfa og að reglusemi hans sé í engu ábótavant.

Svo sem áður greinir var meðal annars áskilið í auglýsingu um dómaraembættin að fram kæmu í umsóknum upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Þær umsagnir, sem nefndin aflaði hjá þessum umsagnaraðilum um störf umsækjenda og persónulega eiginleika þeirra, voru undantekningalaust jákvæðar í þeirra garð.

Af þessum umsögnum og athugunum nefndarinnar verður ráðið, eins og áður er fram komið, að allir umsækjendur uppfylli þær lágmarkskröfur sem gera verður til starfshæfni héraðsdómara samkvæmt 3. og 5. tölulið 4. gr. reglna nr. 970/2020.

5.2. Menntun og framhaldsmenntun

Erna Björt Árnadóttir lauk BA-prófi í lögfræði frá Háskóla Íslands árið 2019 og meistaraprófi frá sama háskóla árið 2021. Samhliða lauk hún diplómanámi á meistarastigi í afbrotafraeði árið 2021. Þá lauk hún diplómanámi á meistarastigi í opinberri stjórnsýslu árið 2024 og meistaránámi í áfallastjórnun við Háskólann á Bifröst í júní 2026. Jafnframt hefur hún sótt ýmis námskeið um lögfræðileg efni.

Jón Stefán Björnsson lauk BS-gráðu í viðskiptalögfræði frá Háskólanum á Bifröst árið 2006 og meistaraprófi í lögum frá Háskólanum í Reykjavík árið 2011. Þá hefur hann sótt ýmis námskeið og endurmenntun á sviði lögfræði og stjórnunar, meðal annars á vegum Endurmenntunar Háskóla Íslands og Opna Háskólans í Reykjavík og öðlaðist löggildingu sem fasteigna- og skipasali árið 2015.

Margrét Helga Kristínar Stefánsdóttir lauk BA-prófi í lögfræði frá Háskóla Íslands árið 2010 og meistaraprófi frá sama háskóla í febrúar 2013. Þá lauk hún prófi í gerð eignaskiptayfirlýsinga í október 2019 og hefur sótt ýmis námskeið um lögfræðileg efni.

Sigmundur Guðmundsson lauk kandidatsprófi í lögfræði frá Háskóla Íslands árið 1991 og námi í vinnumarkaðsfræðum og stjórnun frá Stokkhólmsháskóla árið 1997. Að auki hefur hann sótt ýmsa fyrirlestra og námskeið á sviði lögfræði, meðal annars hjá Lögmannafélagi Íslands og Háskóla Íslands.

Þorbjörg Inga Jónsdóttir lauk embættisprófi frá lagadeild Háskóla Íslands í júní 1993 og útskrifaðist með diplómanámi í þjóðarrétti árið 1995 frá Háskólanum í Helsinki og diplómanámi í viðskipta- og rekstrarfræði árið 2000 frá Endurmenntunarstofnun Háskóla Íslands. Þá lagði hún stund á meistaránám á sviði mannréttinda við Global Campus of Human Rights and Democracy í Feneýjum frá hausti 2024 en því námi er ólokið.

5.2.1. Menntun og framhaldsmenntun – samanburður

Að virtu því, sem að framan greinir, er það mat dómnefndar að *Þorbjörg Inga* sé fremst í þessum matsþætti. Þar á eftir kemur *Erna Björt* sem hefur einnig lagt stund á frekara nám á háskólastigi að loknu laganámi. Þá koma *Margrét Helga* og *Sigmundur* jafnsett, loks *Jón Stefán* sem hefur hlotið löggildingu sem fasteigna- og skipasali og

hefur líkt og aðrir umsækjendur sótt ýmis styttri námskeið um lögfræðileg efni að loknu laganámi.

5.3. Reynsla af dómstörfum

Erna Björt Árnadóttir hefur verið aðstoðarmaður héraðsdómara frá febrúar 2022 eða í rúm fjögur ár.

Jón Stefán Björnsson hefur verið aðstoðarmaður héraðsdómara frá október 2025 eða í um níu mánuði.

Margrét Helga Kristínar Stefánsdóttir var aðstoðarmaður héraðsdómara á árunum 2016 til 2017 og aftur um þriggja mánaða skeið árið 2026, aðstoðarmaður dómara við Landsrétt frá 2018 til 2020 og aðstoðarmaður dómara við Hæstarétt frá 2020 til 2021 eða í rúm fimm ár. Á árinu 2021 var hún settur héraðsdómari og jafnframt dómstjóri við Héraðsdóm Vestfjarða um þriggja mánaða skeið og settur héraðsdómari við Héraðsdóm Reykjaness í þrjá og hálfan mánuð árið 2025.

Sigmundur Guðmundsson hefur ekki reynslu af störfum sem falla undir þennan matsþátt.

Þorbjörg Inga Jónsdóttir hefur tvisvar tekið sæti sem oddamaður í gerðardómi.

5.3.1. Reynsla af dómstörfum – samanburður

Samkvæmt framansögðu hafa fjórir umsækjendur reynslu af störfum sem falla undir þennan matsþátt. Þrír hafa reynslu af því að starfa sem aðstoðarmenn héraðsdómara, þar af hefur einn umsækjandi að auki reynslu af því að starfa sem aðstoðarmaður dómara í Landsrétti og Hæstarétti og hefur tvívegis verið settur héraðsdómari. Einn umsækjandi hefur reynslu af því að sitja í gerðardómi.

Samkvæmt framansögðu stendur *Margrét Helga* fremst umsækjenda í þessum matsþætti en hún hefur tvívegis verið settur héraðsdómari í rúmlega sex mánuði samtals, við Héraðsdóm Reykjaness annars vegar og Héraðsdóm Vestfjarða hins vegar og var þá einnig dómstjóri við dómstólinn. Þá hefur hún verið aðstoðarmaður dómara á öllum dómstigum, í samtals rúm fimm ár. Þá kemur *Erna Björt* sem hefur starfað sem aðstoðarmaður héraðsdómara í rúm fjögur ár, svo *Jón Stefán* sem hefur

verið aðstoðarmaður héraðsdómara í um níu mánuði. Á eftir honum kemur *Þorbjörg Inga* sem hefur reynslu af gerðardómstörfum.

5.4. Reynsla af lögmanns- og málflutningsstörfum

Erna Björt Árnadóttir hefur ekki greint frá reynslu af störfum í þessum matsþætti.

Jón Stefán Björnsson öðlaðist réttindi sem héraðsdómslögmaður árið 2013 og var lögmaður í starfi hjá Arion banka frá 2015 til 2017 og flutti þar fimm mál fyrir héraðsdómstólum. Þá fékkst hann meðal annars við málflutning fyrir héraðsdómstólum í störfum sínum hjá Tollstjóra á árunum 2017 til 2020 og hjá skattrannsóknarstjóra frá 2022 til 2025. Hann hefur einkum flutt mál á á sviði einkamála- og fullnusturéttarfars en einnig á sviði sakamálaréttarfars í tengslum við rannsóknargerðir vegna rannsókna skattrannsóknarstjóra.

Margrét Helga Kristínar Stefánsdóttir öðlaðist réttindi sem héraðsdómslögmaður í apríl 2013 og starfaði sem fulltrúi á lögmannsstofu að loknu laganámi þar til í ágúst 2016 en sem sjálfstætt starfandi lögmaður frá maí 2023 til loka febrúarmánaðar 2025 og aftur frá miðjum júlí til október sama ár. Hún hefur fengist við fjölþætt málflutningsstörf og flutt 25 mál fyrir héraðsdómstólum, bæði einkamál og sakamál.

Sigmundur Guðmundsson öðlaðist réttindi sem héraðsdómslögmaður árið 1995 og réttindi til þess að flytja mál fyrir Landsrétti árið 2022. Hann var sjálfstætt starfandi lögmaður frá 2003 til 2023 og var lengst af með eigin rekstur í félagi við annan lögmann. Þá flutti hann sig um set á aðra lögmannsstofu þar sem hann starfar nú. Hann hefur fengist við fjölþætt málflutningsstörf og flutt fjölda mála, einkum fyrir héraðsdómstólum, bæði einkamál og sakamál.

Þorbjörg Inga Jónsdóttir öðlaðist málflutningsréttindi fyrir héraðsdómi árið 1994 og Hæstarétti árið 2002. Hún hefur verið sjálfstætt starfandi lögmaður með eigin rekstur í tæpa þrjá áratugi. Hún hefur fengist við fjölþætt málflutningsstörf og flutt fjölda mála á öllum dómstigum bæði einkamál og sakamál.

5.4.1. *Reynsla af lögmanns- og málflutningsstörfum – samanburður*

Fjórir umsækjendur hafa fengist við lögmanns- og málflutningsstörf en í mislangan tíma. Við mat á umsækjendum í þessum matsþætti er litið til þess hve lengi þeir hafa starfað sem lögmenn, þar á meðal hvort þeir hafi haft réttindi til flutnings mála fyrir æðri dómi. Einnig er horft til þess hvort umsækjendur hafi unnið sjálfstætt að lögmannsstörfum, sbr. 1. mgr. 12. gr. laga nr. 77/1998 um lögmenn, hvort þeir hafi gert það samhliða öðrum störfum, hversu mörg mál þeir hafa flutt og hvort störfin hafi verið fjölbreytileg þannig að þeir hafi fengist við mál á sem flestum réttarsviðum eða einungis á afmörkuðum sviðum. Jafnframt skiptir máli hvort þeir hafi flutt vandasöm mál fyrir dómi, ekki síst Hæstarétti og Landsrétti, svo og hvort önnur mál, sem þeir hafa fengist við sem lögmenn, hafi verið yfirgripsmikil eða flókin úrlausnar. Reynsla af störfum umsækjenda á lögmannsstofum án þess að þeir hafi haft lögmansréttindi vegur tiltölulega lítið í þessum þætti mats. Loks er höfð hliðsjón af því við mat á málflutningsreynslu umsækjenda hvort störfin, sem um er að ræða, feli jafnframt í sér stjórnsýslureynslu sem fellur undir kafla 5.5.

Samkvæmt framansögðu stendur *Þorbjörg Inga* fremst umsækjenda í þessum matsþætti en hún hefur starfað sem sjálfstætt starfandi lögmaður í um þrjá áratugi. Skammt á eftir henni kemur *Sigmundur* sem hefur verið sjálfstætt starfandi lögmaður í rúm 20 ár og hefur öðlast réttindi til að flytja mál fyrir Landsrétti. Næst kemur *Margrét Helga* sem starfaði sem fulltrúi á lögmannstofu í tæplega þrjú og hálft ár og síðar sem sjálfstætt starfandi lögmaður í um tvö ár samtals og fengist við umfangsmikil mál á fjölbreyttu sviði. Þá kemur *Jón Stefán* sem sinnti að vissu marki málflutningsstörfum í krafti lögmansréttinda sinna á meðan hann starfaði hjá opinberum aðilum, en til þess er að líta að flest þeirra starfa hans sem getið er í þessum matsþætti koma að hluta til mats sem reynsla af stjórnsýslustörfum í kafla 5.5.

5.5. *Reynsla af stjórnsýslustörfum*

Hér á eftir verða rakin helstu stjórnsýslustörf sem umsækjendur hafa haft með höndum.

Erna Björt Árnadóttir hefur ekki greint frá störfum sem falla undir þennan matsþátt.

Jón Stefán Björnsson starfaði hjá ríkisskattstjóra í um níu mánuði á árinu 2014, Tollstjóra frá 2017 til 2020 og Skattinum frá 2020 til október 2025, þar af hjá skattrannsóknarstjóra frá 2022.

Margrét Helga Kristínar Stefánsdóttir starfaði hjá dómstólasýslunni um eins og hálfs árs skeið frá desember 2021 til maí 2023 og frá janúar 2026 hefur hún starfað sem lögfræðingur hjá umboðsmanni Alþingis. Hún var ritari kærunefndar útboðsmála frá maí 2023 til desember 2025 og sat sem varamaður í fjölmiðlanefnd frá júlí 2024 en sem aðalmaður í nefndinni frá september það ár fram til desember 2025.

Sigmundur Guðmundsson starfaði sem löglærður fulltrúi sýslumannsins í Kópavogi frá 1991 til 1995, þar af sem staðgengill sýslumanns síðasta árið, og hjá sýslumanninum á Akureyri frá 1999 til 2003. Umsækjandinn sat í umhverfisnefnd Eyjafjarðarsveitar árin 2002 til 2010, þar af sem formaður 2006 til 2010, í skólanefnd Eyjafjarðarsveitar árin 2010 til 2018, þar af formaður 2014 til 2018 og í barnaverndarnefnd Eyjafjarðar árin 2014 til 2018. Frá árinu 2023 hefur hann verið varaformaður Umdæmisráðs landsbyggða sem fer með úrskurðarvald á sviði barnaverndarmála. Þá hefur hann setið í fagráði Háskólans á Akureyri frá 2025 og yfirkjörstjórn Norðausturkjördæmis frá 2022, þar af sem formaður frá júní 2026.

Þorbjörg Inga Jónsdóttir starfaði sem lögfræðingur hjá Ábyrgðasjóði launa frá 1993 til 1994 og hjá vinnumálaskrifstofu félagsmálaráðuneytisins frá 1994 til 1996. Hún sat í kærunefnd útlendingamála frá júní 2016 til desember 2024 og var formaður úrskurðarnefndar um sanngirnismál frá 2011 til 2019. Þá sat hún sem aðalmaður í nefnd um eftirlit með störfum lögreglunnar frá 2017 til febrúar 2025 en hefur verið varamaður í nefndinni frá þeim tíma. Umsækjandinn sat í yfirkjörstjórn Mosfellsbæjar frá 2001, þar af sem formaður frá 2002, ásamt því að vera nefndarmaður í nefndum sveitarfélagsins á sviði húsnæðis-, félags- og fjölskyldumála frá 1994 til 2022, þar af sem varaformaður félags- og barnaverndarnefndar sveitarfélagsins frá 2003.

5.5.1. Reynsla af stjórnsýslustörfum – samanburður

Í þessum þætti hæfnismats hafa fjórir umsækjendur greint frá störfum sem geta falið í sér reynslu af stjórnsýslustörfum. Þegar þau viðfangsefni, sem hér um ræðir hafa verið innt af hendi samhliða aðalstarfi vega þau ekki eins þungt þegar hæfni á

Þessu sviði er metin. Við það mat skiptir enn fremur máli hvort störfin nýstast dómaraefni sérstaklega, sbr. 2. tölulið 4. gr. reglna nr. 970/2020, svo sem seta í úrskurðarnefndum eða vinna fyrir þær. Einnig er litið til þess hvort um er að ræða starf sem metið hefur verið í kafla 5.4.1. Þegar málflutningur hefur falist í starfi hjá öðrum opinberum embættum og stofnunum svo sama starf verði ekki metið tvisvar sinnum. Eins og endranær verður litið til framangreindra starfa og þeim gefið vægi eftir eðli sínu, umfangi og fjölbreytni. Jafnframt verður horft til lengdar starfstíma en einnig þess hversu langt er síðan störfin voru innt af hendi.

Samkvæmt framansögðu stendur *Sigmundur* fremstur umsækjenda í þessum matsþætti en hann starfaði sem löglærður fulltrúi sýslumanns í átta ár samtals, þar af sem staðgengill sýslumanns í eitt ár. Þá hefur hann setið í stjórnarsýslunefndum á sveitarstjórnarstigi og fagraði Háskólans á Akureyri. Þar á eftir kemur *Jón Stefán* sem hefur haft störf hjá tolla- og skattayfirvöldum að aðalstarfi í um átta ár en þess skal getið að þau störf hafa að hluta verið metin sem reynsla af lögmanns- og málflutningsstörfum. Þá kemur *Þorbjörg Inga* sem hefur haft stjórnarsýslustörf að aðalstarfi í um þrjú ár auk þess að búa yfir reynslu af setu í úrskurðarnefndum og hefur verið formaður slíkrar nefndar. Þá hefur hún sinnt öðrum aukastörfum sem falla undir þennan matsþátt, meðal annars á sveitastjórnarstigi. Skammt þar á eftir kemur *Margrét Helga* sem hefur starfað sem lögfræðingur hjá dómstólasýslunni að aðalstarfi í um eitt og hálft ár og hjá embætti umboðsmanns Alþingis í hálft ár, hefur reynslu af setu í úrskurðarnefnd og var ritari kærunefndar um nokkurra ára skeið.

5.6. Reynsla af fræðistörfum o.fl.

5.6.1. Kennsla á háskólastigi og önnur akademísk störf

Margrét Helga Kristínar Stefánsdóttir var stundakennari í réttarfari við lagadeild Háskóla Íslands árin 2015, 2023 og 2024 og hefur einnig haft umsjón með sviðsettum réttarhöldum í áföngunum Réttarfar I og II og Hlutverki dómara og lögmanna frá 2023 auk þess að hafa verið prófdómari í samkeppnisrétti árið 2018 við sömu deild.

Sigmundur Guðmundsson var prófdómari meistaraþrófsritgerða við Háskólann á Akureyri veturinn 2014 til 2015.

Þorbjörg Inga Jónsdóttir sinnti stundakennslu í eignarétti, kröfurétti og almenntri lögfræði við Háskólann á Bifröst árin 2007 til 2022 og í kröfurétti við Háskólann á Akureyri 2024 til 2025. Auk þessa hefur hún annast kennslu í lögfræðigreinum við Endurmenntunarstofnun Háskóla Íslands og Viðskiptaháskóla VTN.

Erna Björt Árnadóttir og Jón Stefán Björnson tilgreina ekki í umsóknum sínum störf sem heyra hér undir.

5.6.1.1. Kennsla á háskólastigi og önnur akademísk störf – samanburður

Samkvæmt framansögðu stendur *Þorbjörg Inga* fremst í þessum matsþætti en hún hefur sinnt kennslustörfum í hlutastarfi á háskólastigi í um 16 ár, því næst kemur *Margrét Helga* sem einnig hefur sinnt stundakennslu á háskólastigi. Loks kemur *Sigmundur* sem hefur verið prófdómari meistaraþrófsritgerða.

5.6.2. Fræðibækur og -greinar o.fl.

Jón Stefán Björnsson hefur í tvígang kennt á námskeið í Tollaskólanum.

Margrét Helga Kristínar Stefánsdóttir hefur ritað eina ritrýnda grein ásamt öðrum og hefur flutt ýmis erindi, fyrirlestra og kynningar um lögfræðileg málefni.

Þorbjörg Inga Jónsdóttir hefur flutt ýmsa fyrirlestra um lögfræðileg málefni á vegum Mannréttindaskrifstofu Íslands, Þróunarsjóðs EFTA og hjá Reykjavíkurborg.

Erna Björt Árnadóttir og Sigmundur Guðmundsson tilgreina ekki í umsóknum sínum framlög sem heyra hér undir.

5.6.2.1. Fræðibækur og -greinar o.fl. – samanburður

Í þessum þætti er lagt mat á hæfni umsækjenda á grundvelli fræðiskrifa þeirra, fyrst og fremst fræðigreina, og annarra skrifa um lögfræðileg efni. Við matið er litið til gæða þeirra, birtingarvettvangs og jafnframt til fjölda, umfangs og fjölbreytni, auk þess sem horft er til hvort hlutaðeigandi umsækjandi hafi ritað efnið einn eða í samvinnu við aðra. Þá er loks höfð hliðsjón af fyrirlestrum, sem umsækjendur hafa

flutt um lögfræðileg efni á ráðstefnum, fundum eða öðrum áþekktum vettvangi. Síðastnefndi þátturinn er þó tiltölulega léttvægur í samanburði við fræðiskrif.

Að þessu virtu stendur *Margrét Helga* fremst umsækjenda en hún hefur ritað eina ritrýnda grein ásamt meðhöfundum og flutt ýmsa fyrirlestra og erindi um lögfræðileg efni. Þá kemur *Þorbjörg Inga* og svo *Jón Stefán*.

5.7. Reynsla af stjórnun

Margrét Helga Kristínar Stefánsdóttir var settur dómstjóri við Héraðsdóm Vestfjarða í þrjá mánuði árið 2021 og starfaði sem verkefnastjóri hjá dómstólasýslunni í um eitt og hálft ár og á lögmannsstofu í rúmlega tvö ár samtals.

Sigmundur Guðmundsson rak eigin lögmannsstofu í félagi við annan lögmann í 20 ár, var formaður umhverfisnefndar Eyjafjarðarsveitar árin 2006 til 2010, formaður skólanefndar Eyjafjarðarsveitar frá 2014 til 2018 og hefur frá 2023 verið varaformaður Umdæmisráðs landsbyggða sem fer með úrskurðarvald á sviði barnaverndarmála. Þá hefur hann verið formaður Félags lögfræðinga á Norður- og Austurlandi frá 2024 og formaður yfirkjörstjórnar Norðausturkjördæmis frá júní 2026.

Þorbjörg Inga Jónsdóttir hefur rekið eigin lögmannsstofu frá árinu 1996 og sat í stjórn Sparisjóðs Vestmannaeyja 2011 til 2015, þar af sem formaður frá 2013. Hún var jafnframt formaður Úrskurðarnefndar um sanngirnismætur 2011 til 2019, formaður yfirkjörstjórnar Mosfellsbæjar 2002 til 2020 og varaformaður félags- og barnaverndarnefndar sveitarfélagsins 2003 til 2022. Hún var framkvæmdastjóri Kvennaráðgjafarinnar 1996 til 2024, stjórnarformaður Bjarkarhlíðar í Reykjavík 2019 til 2023 og stjórnarmaður í Bjarmahlíð á Akureyri 2018 til 2024. Þá sat hún í stjórn Kvenréttindafélags Íslands 1999 til 2009, lengst af sem formaður félagsins, eða frá 2000 og í stjórn International Alliance of Women.

Erna Björt Árnadóttir og *Jón Stefán Björnsson* greina ekki frá störfum í umsóknum sínum sem heyra hér undir.

5.7.1. *Reynsla af stjórnun – samanburður*

Í þessum þætti kemur til skoðunar reynsla umsækjenda af margvíslegum viðfangsefnum sem eiga það öll sameiginlegt að hafa falið í sér stjórnun í einni eða annarri mynd. Við mat á hæfni umsækjenda er litið til þess í hverju slík störf hafa verið fólgin, þar á meðal hversu góður undirbúningur felst í þeim fyrir starf héraðsdómara. Þá skiptir sömuleiðis máli hve lengi umsækjendur hafa sinnt slíkum störfum.

Samkvæmt framansögðu standa fremst og jafnsett *Sigmundur og Þorbjörg Inga* í þessum matsþætti. Þar á eftir kemur *Margrét Helga*.

5.8. Reynsla af öðrum störfum sem nýtast dómaraefni o.fl.

Hér á eftir verða rakin önnur helstu störf og verkefni, sem umsækjendur hafa fengist við og nýtast myndu þeim í dómaraembætti að mati dómnefndar, enda hafi þeirra ekki áður verið getið, svo sem í köflum 5.5. og 5.7. Einungis verða tekin til mats þau framlög sem umsækjendur hafa vísað til í umsóknum sínum eða eftir atvikum látið fylgja þeim.

Erna Björt Árnadóttir hefur verið varamaður í stjórn dómstólasýslunnar frá 2017 og hefur á tímabilinu fjórum sinnum tekið sæti í forföllum aðalmanns. Þá hefur hún setið í stýri- og vinnuhópum á vegum dómstólasýslu og dómsmálaráðuneytis auk þess að hafa verið í hópi sem kom að undirbúningi og samningu frumvarps til laga um breytingu á lögum um aðför nr. 90/1989 og lögum um nauðungarsölu nr. 90/1991 ásamt síðari breytingum sem sneri að stafrænni málsmeðferð.

Jón Stefán Björnsson starfaði að lögfræðilegum verkefnum og síðar sem lögfræðingur hjá Íslandsbanka frá 2010 til 2014. Þá hefur hann átt sæti í stjórn unglingaráðs knattspyrnudeildar Breiðabliks frá árinu 2022.

Margrét Helga Kristínar Stefánsdóttir sat í vinnuhópi á vegum dómsmálaráðuneytisins sem vann tillögur að reglum um birtingar af hálfu dómstóla, lögreglu og ákærvalds í stafrænu pósthólfi stjórnvalda veturinn 2022 til 2023. Hún sat einnig í Laganefnd Lögmannafélags Íslands á árunum 2024 til 2025 og var tengiliður Landsréttar og Hæstaréttar í samstarfsneti æðri dómstóla á vegum Mannréttindadómstóls Evrópu (Superior Courts Network) á árunum 2019 til 2021.

Sigmundur Guðmundsson hefur setið í stjórn Félags lögfræðinga á Norður- og Austurlandi frá 2010, þar af sem formaður frá 2024.

Þorbjörg Inga Jónsdóttir hefur frá árinu 1993 verið sjálfbóðaliði í Kvennaráðgjöfinni sem veitir ókeypis félags- og lögfræðiráðgjöf fyrir konur. Hún var einnig lögfræðiráðgjafi og verkefnastjóri hjá Mannréttindaskrifstofu Íslands 2010 til 2024. Þá hefur hún tekið þátt í ýmsu nefndarstarfi og sat meðal annars í jafnréttisráði Íslands 2001 til 2009.

5.8.1. Reynsla af öðrum störfum sem nýtast dómaraefni o.fl. – samanburður

Eins og áður greinir koma einungis til álita við mat á hæfni umsækjenda í þessum þætti þau störf, sem ekki hafa verið felld undir aðra matsþætti, svo sem stjórnarsýslustörf eða stjórnun, enda geti þau að mati dómnefndar varpað ljósi á hæfni þeirra til að gegna embætti héraðsdómara. Ef um er að ræða aðalstarf umsækjanda vegur það eðli máls samkvæmt þyngra en aukastörf sem innt eru af hendi samhliða öðrum störfum svo sem aðkoma starfsmanna ráðuneyta að gerð lagafrumvarpa.

Sé litið til starfa umsækjenda sem falla hér undir stendur *Jón Stefán* fremstur í þessum matsþætti en hann hefur haft störf sem falla undir þennan matsþátt að aðalstarfi í rúm þrjú ár eftir að hann lauk fullnaðarprófi í lögfræði. Þá koma jafnsettar *Erna Björt*, *Margrét Helga* og *Þorbjörg Inga*. Loks *Sigmundur*.

5.9. Sérstök starfshæfni

Í 4. tölulið 4. gr. reglna nr. 970/2020 segir m.a. að mikilvægt sé að umsækjandi hafi einkamála- og sakamálaréttarfar á valdi sínu. Einnig verði hann að geta stjórnað þinghöldum af röggsemi og sanngirni og afgreitt þau mál, sem honum eru fengin, bæði fljótt og af öryggi.

Hvað þennan þátt mats varðar hafa umsækjendur greint frá störfum sem geta fallið hér undir. Að mati dómnefndar skiptir einkum máli, þegar lagt er mat á hvort umsækjandi hafi einkamála- og sakamálaréttarfar á valdi sínu, hver sé reynsla hans af dóms- og málflutningsstörfum og hvert sé framlag hans í formi kennslu og fræðiskrifa á sviði réttarfars sem og aðkoma hans að samningu lagafrumvarpa á því sviði.

Með tilliti til þeirra starfa, sem umsækjendur hafa gegnt á liðnum árum, lítur dómnefnd einnig svo á að þeir séu hæfir til að stjórna þinghöldum af röggsemi og sanngirni og muni afgreiða þau mál, sem þeim eru fengin, bæði skjótt og vel. Það er því niðurstaða nefndarinnar að ekki séu efni til að gera upp á milli umsækjenda hvað þennan matsþátt varðar.

6. Færni umsækjenda til að semja dóma

Í 4. gr. reglna nr. 970/2020 er meðal annars vísað til þess að umsækjandi um embætti dómara þurfi að hafa til að bera almenna og víðtæka lögfræðilega þekkingu og máli skipti hvort hann hafi sýnt sjálfstæði, óhlutdrægni, frumkvæði og skilvirkni í starfi, svo og hvort hann eigi auðvelt með að skilja aðalatriði frá aukaatriðum. Ennfremur að hann geti farið að fyrirmælum laga um samningu dóma og ritað þá á góðu máli. Eftir því sem umsækjandi hefur tileinkað sér betur þessi atriði, þeim mun færari er hann um að kveða upp dóm eða úrskurð í dómsmáli. Dómsúrlausnir hans og stjórnarsýsluúrskurðir sem og málflutningsskjöl á borð við greinargerðir geta auk annars veitt vísbendingar um hversu vel hann er að sér þegar kemur að því að beita réttarheimildum og skýra lög sem við eiga hverju sinni. Af þeim verður ekki síður ályktað hversu auðvelt umsækjandi ætti með að reifa í stuttu máli og um leið með fullnægjandi hætti málsatvik og ágreiningsefni dómsmáls og komast síðan að vel rökstuddri niðurstöðu um sönnunar- og lagaatriði, sbr. d- og f-liði 1. mgr. 114. gr. laga nr. 91/1991 um meðferð einkamála, sbr. og d-, f- og g-liði 2. mgr. 183. gr. laga nr. 88/2008 um meðferð sakamála, sbr. einnig dóma Hæstaréttar 19. desember 2017 í málum nr. 591/2017 og 592/2017. Hefur nefndin lagt áherslu á það sjónarmið í mati sínu að horfa til færni umsækjenda til að nýta lögfræðilega þekkingu sína og starfsreynslu við úrlausn dómsmála. Í samræmi við þetta hefur dómnefnd lagt sérstakt og rökstutt mat á færni hvers og eins umsækjenda til að semja dóma. Hefur verið horft til þeirra framlaga sem fylgdu umsóknum þeirra og annarra gagna, sem aðgengileg eru, svo sem heimilt er samkvæmt 3. mgr. 5. gr. reglna nr. 970/2020.

Vegna þess að starfsreynsla umsækjenda er ólík innbyrðis hefur dómnefnd þurft að beita mismunandi aðferðum í þessum hluta matsins en tekin voru til mats sex framlög umsækjenda. Við þennan hluta matsins var sjónum einkum beint að því

hvernig umsækjendum hefur tekist að nýta þá lögfræðilegu þekkingu, sem þeir búa yfir, við að greina álitæfnin sem um var að ræða og eftir atvikum að leysa úr þeim. Þegar borin er saman færni einstakra umsækjenda til að semja dóma var jafnframt litið til þess hversu fjölbreytt lögfræðileg úrlausnarefni þeir hafa fengist við, sér í lagi hin síðari ár, og hversu flókin úrlausnar þau hafa verið. Loks hefur sem fyrr segir verið höfð hliðsjón af öðrum skrifum umsækjenda um lögfræðileg efni.

Það er niðurstaða nefndarinnar að allir umsækjendur búi yfir færni til að semja dómsúrlausnir í héraðsdómi. Við samanburð milli umsækjenda er það jafnframt niðurstaða nefndarinnar samkvæmt heildarmati framangreindra þátta að *Margrét Helga Kristínar Stefánsdóttir* hafi með framlögum sínum sýnt fram á að hún sé færust umsækjenda til að semja dómsúrlausnir. Úrlausnir þær sem hún hefur staðið að eru glöggar og studdar lögfræðilegum rökum. Til viðbótar lítur nefndin til fræðilegs framlags hennar. Að mati dómnefndar sýna framlög hennar fram á góða færni til að fjalla um og greina lögfræðileg álitæfni með skipulegum hætti og á góðu máli og að hún geti tekist á við fjölbreytt lögfræðileg álitæfni á ýmsum réttarsviðum. Stendur hún fremst umsækjenda að þessu leyti

7. Niðurstaða dómnefndar

Verkefni dómnefndar samkvæmt 1. mgr. 12. gr. laga nr. 50/2016 er að taka afstöðu til þess hverjir umsækjenda séu hæfastir til að gegna þeim embættum héraðsdómara sem hér er fjallað um. Að framan hefur verið fjallað sérstaklega um þau sjónarmið sem dómnefnd ber að líta til við störf sín samkvæmt 4. gr. reglna nr. 970/2020. Þau hljóta eðli máls samkvæmt að hafa ólíkt vægi innbyrðis, en ekkert eitt þeirra getur ráðið úrslitum.

Ef litið er til þeirra matsþátta sem fjallað er um í köflum 5.2. – 5.9. þar sem reynsla af dómstörfum, lögmanns- og málflutningsstörfum og stjórnsýslustörfum vega þyngst og hafa jafn mikið vægi hver þáttur um sig og matsþættirnir allir virtir í heild er það niðurstaða dómnefndar að umsækjendurnir *Margrét Helga Kristínar Stefánsdóttir*, *Sigmundur Guðmundsson* og *Þorbjörg Inga Jónsdóttir* standi fremst umsækjenda að þessu leyti og að ekki verði gert upp á milli þeirra í þessum þætti matsins. Er þá ekki aðeins litið til þess hve þau störf sem umsækjendur hafa sinnt eru

fjölbreytt heldur ekki síður hve verkefnin sem þeir hafa fengist við í sama starfi eru margbreytileg. Þá er það jafnframt álit dómnefndar, eins og gerð er grein fyrir í kafla 6, að *Margrét Helga Kristínar Stefánsdóttir* hafi með framlögum sínum sýnt mesta færni umsækjenda til að semja dóma.

Að virtum starfsferli þeirra og með skírskotun til alls þess sem áður greinir um hæfni til að semja dóma er það niðurstaðan af heildstæðu mati dómnefndar að *Margrét Helga Kristínar Stefánsdóttir* standi öðrum umsækjendum framar við þetta mat. Að mati nefndarinnar hefur hún sýnt sjálfstæði, hlutlægni, frumkvæði og skilvirkni í starfi og að hún eigi auðvelt með að skilja aðalatriði frá aukaatriðum. Þá býr hún einnig yfir góðri þekkingu á íslensku máli og er leikið að tjá sig í ræðu og riti. Samkvæmt umsóknargögnum, umsögnum og því sem fram kom í viðtölum hefur hún til að bera almenna og viðtæka lögfræðilega þekkingu á breiðum sviðum lögfræðinnar. Þá bera framlög hennar, þar á meðal ritsmið hennar, vott um færni til að greina og leysa skýrlega úr lögfræðilegum álitaefnum á ólíkum réttarsviðum.

Margrét Helga Kristínar Stefánsdóttir lauk BA-prófi í lögfræði frá Háskóla Íslands árið 2010 og meistaraþrófi frá sama háskóla í febrúar 2013. Hún öðlaðist réttindi sem héraðsdómslögmaður sama ár og starfaði á lögmannsstofu að loknu lagaprófi til ársins 2016 þegar hún hóf störf sem aðstoðarmaður dómara við Héraðsdóm Reykjaness. Hún gegndi því starfi í um tvö ár en starfaði í framhaldinu sem aðstoðarmaður dómara við Landsrétt um tveggja ára skeið og síðar við Hæstarétt. Þá starfaði hún sem aðstoðarmaður dómara í sérverkefnum við Héraðsdóm Norðurlands eystra haustið 2025. Umsækjandinn hefur tvívegis verið sett í embætti héraðsdómara. Annars vegar við Héraðsdóm Vestfjarða í tvo og hálfan mánuð á árinu 2021 þar sem hún gegndi jafnframt störfum dómstjóra og hins vegar við Héraðsdóm Reykjaness í þrjá og hálfan mánuð á árinu 2025. Hún starfaði sem sjálfstætt starfandi lögmaður og verkefnastjóri á lögmannsstofu í tvö ár samtals frá árunum 2023 til 2025. Þá starfaði hún hjá dómstólasýslunni sem verkefnastjóri stafrænnar umbreytingar málsmeðferðar í um eitt og hálf ár frá 2021 til 2023 og hóf í janúar 2026 störf sem lögfræðingur hjá umboðsmanni Alþingis. Hún starfaði sem ritari kærunefndar útboðsmála frá 2023 til 2025 og var varamaður í fjölmiðlanefnd frá júlí til september 2024 en aðalmaður frá þeim tíma til desember 2025. Hún hefur ritað eina ritrýnda

fræðigrein ásamt öðrum og hefur meðal annars verið stundarkennari í réttarfari við lagadeild Háskóla Íslands ásamt öðrum aukastörfum.

Ályktarorð:

Með skírskotun til 1. mgr. 12. gr. laga nr. 50/2016 um dómstóla er það niðurstaða dómnefndar að *Margrét Helga Kristínar Stefánsdóttir* sé hæfust til að hljóta skipun í embætti héraðsdómara með fyrsta starfsvettvang við Héraðsdóm Norðurlands eystra, sbr. auglýsingu 8. maí 2026.

Reykjavík 13. júlí 2026.


Ása Ólafsdóttir


Helga Melkorka Óttarsdóttir


Jóhannes Sigurðsson


Reimar Pétursson


Þorgeir Örlygsson

